



Januar, 2025. godine

Školarac

ŠKOLSKI LIST UČENIKA OŠ "MRAMOR"

Bazar
Posjete

Zanimljivosti

Ekskurzija u Neum



Intervjui

Kupujmo domaće, gradimo BiH

Aktivnosti

Savjeti



RIJEČ DIREKTORA ŠKOLE

SADRŽAJ

U ovom broju donosimo:

<i>Sadržaj - riječ direktora.....</i>	<i>2</i>
<i>Dan učitelja - Ispraćaj u penziju.....</i>	<i>3</i>
<i>Bazar.....</i>	<i>4</i>
<i>Dan rudara - Husinska buna.....</i>	<i>5</i>
<i>Kupujmo domaće.....</i>	<i>6</i>
<i>Dan krunisanja kralja Tvrtka.....</i>	<i>7</i>
<i>Dan državnosti.....</i>	<i>8</i>
<i>Posjeta Memorijalnom centru u Potočarima.....</i>	<i>9</i>
<i>Posjeta Centru za rehabilitaciju.....</i>	<i>10</i>
<i>Maturalna ekskurzija.....</i>	<i>11</i>
<i>Posjeta Cinestaru.....</i>	<i>12</i>
<i>Međunarodni dječiji festival vezeni most.....</i>	<i>13</i>
<i>Opremanje kabineta - Uređenje školskog dvorišta.....</i>	<i>14</i>
<i>STEMPower Girls - Ogledni sat</i>	<i>15</i>
<i>Intervjui.....</i>	<i>16</i>
<i>Prilog PŠ "Dragunja".....</i>	<i>17</i>
<i>Vrijedni učenici IIIa.....</i>	<i>18</i>
<i>Pedagoški kutak.....</i>	<i>19</i>

Poštovani roditelji, drage kolege nastavnici i dragi učenici,

s velikim zadovoljstvom vam se obraćam povodom izdavanja još jednog broja našeg školskog lista „Školarac“. Ovo izdanje svjedoči o predanom radu, kreativnosti i entuzijazmu svih koji su doprinijeli njegovom nastanku - od učenika i nastavnika od roditelja.

Školski list je više od samog prikaza naših aktivnosti; on je odraz naše zajednice, našeg zajedničkog truda i uspjeha. Kroz stranice „Školarca“ možete zaviriti u svijet naših učenika - njihove uspjehe, talente, kreativne ideje i misli. Ovo izdanje donosi priče koje inspirišu, prikazuju sve ono što nas čini ponosnima i podsjeća nas na snagu zajedništva. Dragi učenici, hvala vam što nas iznova oduševljavate svojim trudom i zalaganjem. Vaša energija i ideje su pokretač aktivnosti u našoj školi. Poštovani nastavnici, hvala vam što s ljubavlju i strpljenjem vodite naše učenike, podstičući ih da budu najbolja verzija sebe.

Hvala svima koji su doprinijeli stvaranju ovog broja „Školarca“.

S poštovanjem,
Denis Ibrišević

REDAKCIJSKI KOLEGIJ

Izdavač:

JU OŠ "Mramor"

Glavna urednica lista:

Medina Redžić

Dizajn:

Medina Redžić

Lektor:

Demira Aličić

Redakcija:

Denis Ibrišević, Irma Ibrišević, Medina Redžić, Meliha Kišić, Hađija Avdić, Demira Aličić, Šefika Glavić te članovi novinarske sekcije

Svjetski dan učitelja

U JAPANU JEDINI
KOJI SE NISU DUŽNI
KLANJATI CARU
SU **UČITELJI**
MOTIV JE DA NI CAREVI
NE MOGU BEZ UČITELJA

U više od stotinu zemalja naše planete svake godine se obilježava Svjetski dan nastavnika koji je izvrsna prilika da se naglase izazovi s kojima se nastavnici susreću, kao i važnost obrazovanja uopće.

I u našoj školi obilježen je ovaj dan. uz druženje članova kolektiva.

Značaj Svjetskog dana učitelja

UNESCO je proglasio 5. oktobar Svjetskim danom učitelja 1994. godine, u spomen na isti datum 1996. godine, kada je potpisana Preporuka o statusu nastavnika. Prema UNESCO-u, Svjetski dan učitelja prilika je da se pokaže da je rad učitelja/nastavnika prepoznat kao jedan od najvažnijih za ukupan razvoj društva, te da se kao takav i cijeni.

Naši učitelji i nastavnici su ove godine prisustvovali svečanoj akademiji povodom Dana učitelja koja je održana u Bosanskom kulturnom centru u Tuzli.



Ispraćaj u penziju

U decembru 2024. godine, naša škola oprostila se od drage kolegice, nastavnice muzičke kulture, koja je nakon decenija predanog rada otišla u zasluženu penziju. Njeno bogato iskustvo, toplina i entuzijizam ostavili su neizbrisiv trag na generacije učenika i kolega.



Ispraćaj, koji su joj pripremili nastavnici, bio je događaj za pamćenje. Ispraćaj je započeo dirljivim govorima, u kojima su se smjenjivale priče o njenim uspjesima, anegdota iz nastavničkog života i bezbrojnim doprinosima školskoj zajednici.

Jedan od najemotivnijih trenutaka bio je veliki aplauz njenih sadašnjih i bivših kolega, koji su se kroz suze opraštali od kolegice. To je bio jasan dokaz koliko je voljena i cijenjena. Mnogi su imali suze u očima dok su se sjećali njenih radnih dana koji su uvijek bili ispunjeni radošću i kreativnošću. Ispraćaj se nastavio uz druženje, smijeh i prisjećanje na brojne nezaboravne trenutke. Bilo je jasno da odlazak ove izuzetne kolegice neće značiti kraj njenog uticaja na naše živote. Njene riječi i djela nastavit će da inspirišu sve nas koji ostajemo.

Sretni smo što smo imali priliku raditi s nekim poput nje, i želimo joj da uživa u svakom trenutku svog zasluženog odmora, okružena porodicom, prijateljima i, naravno, muzikom koja je uvijek bila njena najveća ljubav.



Bazar povodom Dana rudara

Dana 13. decembra 2024. godine, u našoj školi održan je tradicionalni Bazar povodom obilježavanja Dana rudara. Ovaj Bazar, koji svake godine okuplja učenike, roditelje i osoblje škole, bilo je prilika za druženje, kreativno izražavanje i prikupljanje sredstava za školske projekte i nastavna sredstva.



Hol škole bio je prepun raznovrsnih štandova koje su pripremili učenici uz pomoć svojih roditelja i nastavnika. Na štandovima su se mogli pronaći ručno izrađeni ukrasi, domaći kolači, razni suveniri i kreativni radovi učenika inspirisani rudarskom tradicijom.

Pored prodajnih štandova, posjetitelji su mogli uživati u izložbi radova naših učenika, odajući počast rudarima i njihovom teškom, ali plemenitom radu.

Sredstva prikupljena na Bazaru biće iskorištena za unapređenje školskog prostora i organizaciju budućih edukativnih aktivnosti. Ove godine, zahvaljujući velikodušnosti posjetitelja, prikupljen je solidan iznos, što svjedoči o zajedničkom duhu i solidarnosti svih učesnika.

Bazar povodom Dana rudara još jednom je pokazao kako zajednički trud i kreativnost mogu rezultirati nezaboravnim događajem. S ponosom možemo reći da je naša škola još jednom potvrdila svoju ulogu ne samo kao obrazovne ustanove, već i kao mjesta koje okuplja ljude i njeguje zajedništvo.



Husinska buna i Dan rudara

Husinska buna nije samo priča o rudarima, nego i o hrabrosti, solidarnosti i odlučnosti da se izbori pravda. Svi mi možemo naučiti mnogo iz ove priče i nastaviti poštovati rad onih koji su doprinijeli razvoju naše zajednice. Neka Dan rudara bude podsjetnik na vrijednosti koje su nam ostavili hrabri rudari Husina.



Spomenik Rudar na Husinu



Postavka izložbe Husinska buna u Sarajevu
- Muzej istočne Bosne

Husinska buna je jedan od najvažnijih događaja u historiji radničkog pokreta Bosne i Hercegovine. Ova pobuna rudara iz mjesta Husino kod Tuzle dogodila se 21. decembra 1920. godine. Bila je to borba rudara za pravdu, bolje uslove rada i dostojanstvo.

Na početku 20. stoljeća, rudari su radili u teškim uvjetima. Njihovi poslovi bili su opasni, a plate niske. Nisu imali odgovarajuću sigurnosnu opremu, a nesreće u rudnicima bile su česte. Kada su rudari odlučili da se organizuju i zahtijevaju bolje uslove rada, vlasti tadašnje Kraljevine Srba, Hrvata i Slovenaca pokušale su ugušiti njihov štrajk.

Vlasti su poslale vojsku da se obračuna s rudarima. U sukobima koji su uslijedili, nekoliko rudara je poginulo, a mnogi su povrijeđeni ili uhapšeni. Iako su se suočili s velikim gubicima, rudari su pokazali nevjerovatnu hrabrost i odlučnost da se bore za svoja prava.

Husinska buna simbolizuje borbu za pravdu i bolje uvjete rada. Ona je podsjetnik na to koliko su radnici nekada morali žrtvovati kako bi izborili prava koja danas smatramo normalnim, poput pristojne plate, sigurnih uvjeta rada i prava na štrajk.

Husinska buna, bio je dakle oružani otpor rudara rudnika Kreke protiv nasilja organa državne vlasti tijekom generalnog štrajka rudara Bosne i Hercegovine, od 21. do 28. prosinca 1920. godine, nazvan po rudarskom selu Husinu kod Tuzle. Područje koje je zahvatila buna bilo je područje Husina, Lipnice i Morančana. Premda je štrajk izbio zbog vladinog kršenja sporazuma o visini nadnica, koji je ona sama potpisala, proglašen je subverzijom. Optuženi rudari branili su se da su se jedino borili za radnička prava te da nije bilo nikakvog elementa ustanka protiv države. U generalnom štrajku sudjelovalo je oko 7.000 radnika, a vodila ga je Komunistička partija preko Saveza rudara, na čelu s Mitrom Trifunovićem Učom.

Dan rudara

U znak sjećanja na Husinsku bunu, svake godine 21. decembra obilježava se Dan rudara. Na taj dan odajemo počast svim rudarima i njihovom doprinosu zajednici. Organizuju se priredbe, polaganje cvijeća na spomenike i razni drugi događaji u rudarskim mjestima.

Kupujmo domaće - Gradimo Bosnu i Hercegovinu!

Posljednja sedmica u mjesecu novembru bila je u znaku važne kampanje „Kupujmo domaće - Gradimo Bosnu i Hercegovinu“. Cilj ove inicijative bio je da se učenicima približi značaj podrške domaćoj proizvodnji i razvije svijest o tome koliko je važno kupovati proizvode iz naše zemlje.

Radionice i aktivnosti

U sklopu kampanje, organizovane su kreativne radionice u kojima su učenici učili o domaćim proizvodima i njihovoj vrijednosti. Na radionicama su učenici IXb i VIb donosili domaće proizvode u školu i predstavljali ih svojim vršnjacima. Među proizvodima su se našli tradicionalni prehrambeni artikli poput meda, domaćih sokova, mliječnih proizvoda, suhomesnatih proizvoda i rukotvorine.

Učenici su, također, pripremali referate o porijeklu tih proizvoda, načinu njihove proizvodnje i značaju podrške lokalnim proizvođačima. Na taj način su se edukovali o bogatstvu koje Bosna i Hercegovina posjeduje kroz svoje prirodne resurse i vrijedne ljude.

Edukativna afiša

Novinarska sekcija škole dala je svoj doprinos ovoj kampanji. Pripremili su edukativnu afišu s porukama o značaju kupovine domaćih proizvoda. Afiša je bila bogato ilustrovana i sadržavala je korisne informacije o prednostima podrške domaćoj privredi. Ona je podijeljena po svim odjeljenjima kako bi svi učenici mogli naučiti nešto novo i podijeliti tu ideju sa svojim porodicama.

Izložba u holu škole

Kao kruna svih aktivnosti, učenici su organizovali izložbu domaćih proizvoda u holu škole. Na izložbi su bili izloženi plakati sa različitim proizvodima, ali i plakati koje su sami izradili. Prolaznici su mogli vidjeti raznovrsnost i kvalitet domaćih proizvoda, a učenici su imali priliku da na kreativan način promovišu ono što naša zemlja nudi.

Zašto je važno kupovati domaće?

Tokom svih aktivnosti, učenici su naučili da kupovina domaćih proizvoda doprinosi razvoju naše zemlje. Svaki domaći proizvod koji kupimo pomaže otvaranju novih radnih mjesta, jačanju lokalne ekonomije i očuvanju tradicionalnih vrijednosti. Ova kampanja je pokazala da mali koraci, poput izbora domaćeg proizvoda umjesto stranog, mogu imati veliki utjecaj na budućnost Bosne i Hercegovine.

Zaključak

Kampanja „Kupujmo domaće – Gradimo Bosnu i Hercegovinu“ ne samo da je edukovala učenike, nego ih je i podstakla da postanu ambasadori ove važne poruke u svojim porodicama i zajednicama. Ovaj projekat nas podsjeća na to koliko je važno vjerovati u potencijal naše zemlje i raditi na njenom jačanju kroz zajedničke napore.



**Kupujmo
i koristimo
domaće!**

Obilježavanje Dana krunisanja kralja Tvrtka

Naša škola je, i ove godine, obilježila Dan krunisanja kralja Tvrtka I Kotromanića, jednog od najznačajnijih vladara u historiji Bosne i Hercegovine. Ovaj događaj, koji simbolizuje državnost i kulturno naslijeđe naše zemlje, bio je inspiracija za raznovrsne aktivnosti u kojima su učenici učestvovali.



Svečani nastup učenika

Centralni dio obilježavanja bio je svečani nastup učenika, održan u holi škole. Uz prigodnu scenografiju, učenici su, pod mentorstvom nastavnice Avdić Hađije, izveli dramatizaciju trenutka krunisanja kralja Tvrtka, uz prikaz njegovih najvažnijih postignuća. Publika je uživala u bogatom programu koji je uključivao recitacije, pjesme i igrokaze koji su dočarali život u srednjovjekovnoj Bosni.



Posebno emotivan trenutak bio je završni govor učenika koji je istakao Tvrtkovu viziju ujedinjene i snažne Bosne. Njegove riječi podsjetile su sve prisutne na važnost očuvanja historijskog naslijeđa i ljubavi prema domovini.

Radionice o kralju Tvrtku

Pored nastupa, održane su i radionice u kojima su učenici imali priliku dublje istražiti period vladavine kralja Tvrtka. Na radionicama su učenici izrađivali makete srednjovjekovnih dvoraca, oslikavali grbove i izrađivali replike srednjovjekovnog nakita.




Kroz ove kreativne aktivnosti učenici su ne samo razvijali svoje vještine, već su i učili o značaju Tvrtkove krune, njegovih osvajanja i doprinosa jačanju bosanske države. Nastavnici su ih vodili kroz historijske izvore i priče o kralju, čime su dodatno obogatili njihovo znanje.

Poruka za budućnost

Obilježavanje Dana krunisanja kralja Tvrtka nije samo prilika za učenje o prošlosti, već i za razmišljanje o budućnosti. Kroz ovaj događaj, učenici su naučili koliko je važno poznavati svoje korijene i ponositi se kulturnim naslijeđem naše zemlje.

Uz sve ove aktivnosti, Dan krunisanja kralja Tvrtka ostavio je snažan utisak na sve učesnike i posjetioce. Naša škola ponosno čuva uspomenu na ovog velikog vladara i nastavlja promovisati vrijednosti koje je on zastupao – jedinstvo, snagu i ljubav prema domovini.



Obilježavanje Dana državnosti BiH

Naši nastavnici i učenici veoma vrijedno rade na obilježavanju važnih datuma u našoj školi. Ove godine svečano smo obilježili Dan državnosti BiH zajedno sa učenicima osnovnih i srednjih škola Tuzlanskog kantona u SKC Mejdan u Tuzli. Grupa učenika, njih 50-tak, prisustvovalo je ovoj divnoj manifestaciji koja je po prvi put, na ovakav način, organizovana od strane Ministarstva obrazovanja i nauke TK, dok je u našoj školi održana prigodna priredba.



Dan državnosti Bosne i Hercegovine ove godine svečano je obilježen u SKC Mejdan u Tuzli, gdje su se okupili osnovci i srednjoškolci iz cijelog Tuzlanskog kantona. Ovaj značajan datum, 25. novembar, podsjeća nas na 1943. godinu kada je na zasjedanju ZAVNOBiH-a u Mrkonjić Gradu potvrđena državnost naše zemlje.

Sadržajan program za mlade

Učesnici su imali priliku da uživaju u bogatom programu koji su pripremili njihovi vršnjaci. Program je započet izvedbom himne Bosne i Hercegovine, nakon čega je uslijedio niz tačaka koje su slavile našu historiju, kulturu i jedinstvo.

Poruke zajedništva

Na svečanosti su se obratili i predstavnici obrazovnih institucija Tuzlanskog kantona. Njihove poruke bile su usmjerene ka očuvanju mira, zajedništva i ljubavi prema domovini. Posebno je istaknuta važnost mladih kao nosilaca budućnosti Bosne i Hercegovine. Obilježavanje Dana državnosti u SKC Mejdan Tuzla pokazalo je kako mladi mogu na kreativan i inspirativan način promovirati vrijednosti naše zemlje. Okupljanje osnovaca i srednjoškolaca iz cijelog kantona dokaz je da zajedništvo i patriotizam imaju snažnu osnovu u mladim generacijama. Ovaj događaj bio je ne samo podsjetnik na prošlost, nego i motivacija za svjetliju budućnost.

Priredba u našoj školi

U našoj školi, također je, u sali za tjelesni i zdravstveni odgoj, održana priredba povodom Dana državnosti BiH, koja je oduševila sve prisutne.



Posjeta Memorijalnom centru u Potočarima

Učenici IX - ih razreda naše škole, zajedno sa svojim razrednicima, direktorom i pedagogicom škole, 19.12.2024. godine posjetili su Memorijalni centar Potočari, mjesto sjećanja na žrtve genocida u Srebrenici. Ova posjeta bila je emotivno snažna i edukativna, pružajući priliku da se direktno suočimo s važnim dijelom naše historije.



Dolazak u Potočare bio je ispunjen tišinom i osjećajem poštovanja. Prvo smo obišli mezarje, gdje su učenici odali počast žrtvama. Bijeli nišani, poredani u savršenom redu, svjedoče o hiljadama nevinih života izgubljenih tokom jula 1995. godine. Mnogi učenici su se zadržali u tihom molitvi ili razmišljanju, shvatajući razmjere tragedije koja se dogodila.

Nakon toga, posjetili smo muzej unutar Memorijalnog centra. Kroz izložbe, fotografije i video-materijale, vodiči su nas proveli kroz priče preživjelih, hronologiju događaja i svjedočanstva koja oslikavaju strahote genocida. Jedna od najdirljivijih izložbi bila je prostorija s ličnim predmetima žrtava - satovima, cipelama i pismima - koji svjedoče o njihovim prekinutim životima.

Tokom posjete, imali smo priliku razgovarati s jednim od preživjelih koji je podijelio svoju priču. Njegove riječi, ispunjene tugom, ali i nadom za budućnost, ostavile su dubok utisak na sve prisutne. Naglasio je važnost čuvanja sjećanja i učenja iz prošlosti kako bi se spriječilo ponavljanje takvih zločina.

Ova posjeta bila je prilika da učenici shvate važnost empatije, tolerancije i mira. Povratak kući bio je ispunjen razmišljanjima i razgovorima o tome kako svako od nas može doprinijeti izgradnji društva u kojem će se poštovati ljudsko dostojanstvo i prava.

Posjeta Memorijalnom centru Potočari nije samo čas historije, već i lekcija o humanosti i obaveza da nikada ne zaboravimo ono što se dogodilo. Ova iskustva nas podsjećaju na važnost sjećanja i djelovanja kako bi buduće generacije mogle živjeti u svijetu bez mržnje i nasilja.

Vedad Paraganlija IX b

NEVER FORGET SREBRENICA



Posjeta Centru za rehabilitaciju u Smolućoj



Dana 23. oktobra 2024. godine, Vijeće učenika naše škole organizovalo je posjetu Javnoj ustanovi Centar za rehabilitaciju i odvikavanje od psihoaktivnih supstanci u Smolućoj, općina Lukavac. Ovaj poseban događaj okupio je učenike sedmog i osmog razreda, kojima je pružena prilika da iz prve ruke čuju priče koje nose snažne životne poruke.

Tokom posjete, učenici su slušali svjedočanstva korisnika ovog centra, ljudi koji su podijelili svoja iskustva u borbi s ovisnošću. Njihove priče bile su iskrene, dirljive i poučne, upozoravajući na opasnosti i posljedice koje donosi upotreba psihoaktivnih supstanci.

„Nadamo se da se njihova iskustva nikada i nikome ne ponove,“ poručili su učenici, podstaknuti slušanim pričama. Ovo je bio trenutak koji ih je podsjetio na važnost zdravih izbora i odgovornog ponašanja.

Pored edukativnog dijela, posjeta je bila prilika da se razvije svijest o solidarnosti i podršci prema osobama koje prolaze kroz proces rehabilitacije. Učenici su izrazili zahvalnost korisnicima centra na otvorenosti i hrabrosti da podijele svoje životne priče.

Nastavnica: Emina Grebić-Muminović



Maturalna ekskurzija u Neum

Početak mjeseca oktobra, 2024. godine, maturanti naše škole uživali su na maturalnoj ekskurziji u Neumu, čime su obilježili početak kraja svog srednjoškolskog obrazovanja na poseban i nezaboravan način. Putovanje je organizirano uz pomoć prijevoznika Liner bus, čiji je udoban autobus bio savršen za dug put.

Po dolasku u Neum, učenici su se smjestili u hotel Zenit, gdje su proveli dvije noći. Hotel je ponudio sve što je bilo potrebno za ugodan boravak – udobne sobe, bazen za opuštanje, te tri obroka dnevno koji su zadovoljili raznolike ukuse svih učenika.

Prvi i drugi dan bili su rezervisani za upoznavanje grada. Učenici su uživali u šetnjama pored plaže, gdje su osjetili miris mora i lagani povjetarac. Navečer je organiziran disko u hotelu, gdje su maturanti plesali i zabavljali se. Učenici su, također uživali u sportskim aktivnostima u sklopu hotela.

Povratak je bio obilježen edukativnim izletom, gdje su posjetili muzej stećaka Radimlja. Kroz stručno vođenje, učenici su saznali više o historiji i značaju stećaka, kao i o kulturnoj baštini ovog područja.

Osim organiziranih aktivnosti, učenici su imali priliku istražiti Neum u slobodno vrijeme, šetajući gradskim ulicama i uživajući u prekrasnim pogledima na Jadransko more. Posljednja večer bila je posebno emotivna, jer su se maturanti još jednom okupili kako bi podijelili dojmove i stvorili uspomene koje će zauvijek pamtili.

Maturalna ekskurzija nije bila samo prilika za zabavu, već i za jačanje prijateljstava i stvaranje novih iskustava. Povratak kući bio je ispunjen pričama, smijehom i zahvalnošću za ove nezaboravne trenutke.

Sigurno će ova ekskurzija ostati jedan od najdražih događaja u životima naših maturanata!

Plan ekskurzije promijenjen je u manjoj mjeri zbog katastrofalnih poplava u Jablanici te je ruta puta izmjenjena kao i posjeta Mostaru i Počitelju, ali su, unatoč tome, zadovoljeni svi očekivani edukativni i drugi ciljevi maturalne ekskurzije koja je protekla u najboljem redu. Naši učenici su bili veoma odgovorni i disciplinovani i nije bilo nikakvih primjedbi.




Učenici u posjeti Cinestaru Tuzla

Učenici od VI do IX razreda uživali u filmu "Dječak i tigar"

Dana 3. decembra 2024. godine, učenici VI, VII, VIII i IX razreda naše škole posjetili su kino u Tuzli kako bi pogledali inspirativni film "Dječak i tigar". Ova dugo iščekivana ekskurzija, organizirana uz pratnju njihovih razrednika, donijela je učenicima mnogo radosti i nezaboravnih trenutaka.

Film "Dječak i tigar" prati priču o prijateljstvu između dječaka i tigra kroz pustolovine koje slave hrabrost, povjerenje i ljubav prema prirodi. Učenici su bili oduševljeni predivnim krajolicima, uzbuđljivim trenucima i važnim porukama koje film prenosi. Posjeta kinu bila je prilika ne samo za uživanje u filmskoj umjetnosti već i za druženje izvan učionica. Mnogi učenici su podijelili svoje dojmove o filmu, ističući kako ih je inspirirao da više cijene prirodu i međusobno prijateljstvo. Razrednici su istaknuli važnost ovakvih aktivnosti u obrazovnom procesu.

"Pored edukativne vrijednosti, ovakvi izleti pomažu učenicima da se bolje povežu, druže i steknu nova iskustva izvan školskog okruženja," rekla je jedna od razrednica.



Dana 5. decembra 2024. godine, naši najmlađi učenici iz PŠ "Dobrnja i Dragunja" imali su priliku, također, uživati u kinu Cinestar u Tuzli. Organizirana posjeta obradovala je veliki broj djece, koja su sa osmijehom na licima gledala animirani film "Moja friki porodica".

Ovaj popularni crtani film, koji donosi zabavnu priču o jednoj neobičnoj porodici i njihovim pustolovinama, oduševio je prisutne svojim humorom, dinamičnom radnjom i važnim porukama o ljubavi, zajedništvu i prihvatanju različitosti.

Tokom posjete, mališani su uživali i u grickalicama koje su bile dio ovog čarobnog iskustva. Kino dvorana bila je ispunjena smijehom i uzbuđenjem, a djeca su s velikom pažnjom pratila svaki trenutak filma.

Naša škola učesnik Međunarodnog dječijeg festivala „Vezeni most“

Međunarodni dječiji festival „Vezeni most“ već godinama zauzima posebno mjesto u kulturnom kalendaru, okupljajući djecu i umjetnike koji stvaraju za njih. Ove školske godine, 2024/2025., naša škola JUOŠ „Mramor“ imala je čast učestvovati u ovom prestižnom projektu, ugostivši književnike za djecu i pridonijevši uređenju scene u Kamernoj sali Doma mladih, gdje je dodijeljena nagrada „Vezeni most“.



Dana 17. oktobra 2024. godine, našu školu posjetili su istaknuti književnici:

1. Fikreta Jašarević
2. Branko Stevandić
3. Zejčir Hasić
4. Nura Suljkanović

Tema susreta bila je „**Razvijanje čitalačkih navika kod djece**“, a aktivnosti su osmišljene kako bi se postigli ciljevi poput razvijanja čitalačke svijesti, poticanja kreativnosti, obogaćivanja vokabulara, te vježbanja tolerancije i uzajamnog razumijevanja.

Aktivnosti susreta

Susret je započeo motivacijom učenika, kroz razgovor o važnosti čitanja i inspirativne primjere iz svakodnevnog života., kombinacijom usmenog izražavanja i diskusije, susret je bio ne samo edukativan već i izuzetno inspirativan za učenike. Književnici su čitali svoja djela, kroz razgovor, učenici su dijelili svoje utiske o pročitanoj djelu.

Učešće naše škole u festivalu „Vezeni most“ još jednom je pokazalo koliko su važni ovakvi projekti za razvoj mladih generacija. Učenici su imali priliku upoznati književnike, razgovarati s njima i na taj način razvijati ljubav prema knjigama i čitanju. Ovaj događaj ostavio je neizbrisiv trag i pokazao koliko je važno ulagati u kulturu, obrazovanje i kreativni razvoj djece.

Uposlenici koji su uzeli učešće u Međunarodnom dječijem festivalu su:

*Baraković Mirsada, Mitrović Lidija,
Hadžimujagić Mirsada, Zukić Lejla,
Morankić Selma i Aličić Demira.*



Opremanje kabineta Islamske vjeronauke



Medžlis Islamske zajednice Tuzla nastavlja s projektima unapređenja obrazovnih uslova u osnovnim i srednjim školama na području Tuzle. Kao dio te inicijative, u Osnovnoj školi „Mramor“ opremljen je kabinet za islamsku vjeronauku, čime su znatno poboljšani uslovi i kvalitet izvođenja nastave ovog predmeta. Kabinet je opremljen potpuno novim namještajem, uključujući klupe, stolice, katedru i ostali učionički inventar.

Ovim povodom, školu su u srijedu, 4. decembra 2024. godine, posjetili glavni tuzlanski imam hafiz Ahmed-ef. Huskanović, pravnik Medžlisa Tuzla Esmir Hasanović i imam u džematu Dobrnja hafiz Abdullah-ef. Okanović.


Tokom posjete, glavni imam Huskanović naglasio je važnost pružanja podrške obrazovnim ustanovama i poboljšanja uslova za učenike i nastavnike, dok je direktor škole Denis Ibrišević iskazao zahvalnost Medžlisu Tuzla za ovu vrijednu donaciju.

„Opremljeni kabinet značajno će unaprijediti izvođenje nastave islamske vjeronauke, a podrška Medžlisa Tuzla daje nam dodatnu motivaciju da našim učenicima pružimo što bolje obrazovanje,“ rekao je direktor Ibrišević.

Riječi zahvalnosti uputila je i nastavnica islamske vjeronauke Emina Grebić Muminović.


Dana, 1.11. 2024. godine Vijeće učenika naše škole je, kroz projekat, „Jedan razred, jedan cvijet“ uljepšalo dvorište svoje škole.

Uređenje školskog dvorišta



STEMPower Girls radionica


U subotu 02. novembra 2024. godine na radionici STEMPower Girls, učestvovala su učenice naše škole: Nejra Buljubašić, Nejra Mahmutović, Lara Delić i Lejla Joldić, uz mentorstvo nastavnika informatike, Buljubašić Almira.



U subotu, 2. novembra 2024. godine, na inspirativnoj STEMPower Girls radionici, na STEM akademiji Tuzla, četiri talentovane djevojke iz naše škole dale su svoj doprinos: Nejra Buljubašić, Nejra Mahmutović, Lara Delić i Lejla Joldić. Ova radionica bila je dio šireg projekta koji ima za cilj osnažiti djevojke da se uključe u područja nauke, tehnologije, inženjeringa i matematike (STEM). Radionica je bila puna zanimljivih aktivnosti koje su potaknule kreativno razmišljanje i rješavanje problema. Naše učenice su se istakle svojim idejama i entuzijazmom, dok su radile na izazovima koji su zahtijevali timski rad i inovativnost. Ovaj događaj nije bio samo prilika za učenje novih vještina, već i za povezivanje s drugim djevojkama koje dijele slična interesovanja. „STEM je budućnost, a mi smo spremne biti njen dio,“ izjavila je Nejra Mahmutović, naglašavajući važnost ovakvih inicijativa za osnaživanje mladih djevojkama. STEMPower Girls radionica je još jednom pokazala koliko je važno pružiti podršku i inspiraciju mladima, posebno djevojkama, kako bi se ohrabrile da slijede svoje snove u područjima koja tradicionalno nisu dovoljno zastupljena ženama.

Čestitamo Nejri Buljubašić, Nejri Mahmutović, Lari Delić i Lejli Joldić na njihovom učešću i želimo im mnogo uspjeha u budućim STEM avanturama!

Upoznajmo Beč: Inspirativni čas u IXb odjeljenju



U našoj školi je u decembru održan veoma zanimljiv Ogledno-ugledni čas. Tema ovog predavanja bila je "Wien" ili Beč, a realiziran je u IXb odjeljenju. Tokom časa, učenici su imali priliku saznati mnogo zanimljivosti o glavnom gradu Austrije, njegovoj bogatoj historiji, kulturi i arhitekturi. Fokus je bio na povezivanju geografskih, kulturnih i jezičkih aspekata ovog veličanstvenog grada, što je učenike motiviralo da aktivno sudjeluju.

Predavanje je obuhvatilo najpoznatije znamenitosti Beča, poput dvorca Schönbrunn, katedrale i poznate opere. Osim toga, razgovarali smo o poznatim ličnostima iz historije Beča, poput Mozarta i Beethovena, te o gastronomskim specijalitetima kao što su bečka šnicla i Sacher torta. Poseban dio časa bio je posvećen interaktivnim aktivnostima. Učenici su u galeriji razgledali Beč i njegove znamenitosti i dijelili vlastita saznanja o Beču te pisali razglednice iz Beča. Njihova kreativnost i angažmanost bile su impresivne.

„Ovaj čas je bio zaista inspirativan. Puno smo naučili o Beču i osjetili njegovu jedinstvenu atmosferu, iako smo fizički daleko,“ rekla je jedna od učenica. Ovakvi časovi pokazuju koliko je važno povezivati znanje iz različitih područja i motivirati učenike da otkrivaju svijet. Nastavnica njemačkog jezika, Medina Redžić zahvalila se IXb odjeljenju na sjajnoj energiji i učešću!

★ Intervjui

INTERVJU SA PEDAGOGICOM NAŠE ŠKOLE, IBRIŠEVIĆ IRMOM

1. Možete li nam se kratko predstaviti i reći nešto zanimljivo o sebi?

Ja sam Irma Ibrišević, pedagogica u JU OŠ Mramor od ove školske godine pa na dalje. Moj put ka stalnom zaposlenju bio je veoma dug ali i zanimljiv. Radila sam u više škola u raznim mjestima, tako da sam upoznala mnogo dobrih ljudi i stekla prijatelje za cijeli život.

2. Možete li nam navesti neke prednosti ali i mane Vašeg posla?

Oduvijek sam zamišljala da radim sa djecom. Po završetku osnovne škole upisujem srednju Učiteljsku školu, gdje se kroz školovanje razvija još veća ljubav prema radu s djecom. Bilo je tu i dosta prakse tako da sam već u trećem razredu znala da će pedagogija biti moj izbor. Ovaj posao zna biti težak i zahtjevan, ali ujedno i lijep, ako ga volite. Rekla bih da je prednost u tome što smo na raspolaganju svima u pružanju stručne pomoći, prije svega učenicima, a onda i nastavnicima i roditeljima. Najveća mana bi možda bila papirologija kojom se sve mora potkrijepiti.

3. Da niste pedagog ko biste bili?

Da nisam pedagog najvjerovatnije bih bila učiteljica ili nastavnica geografije. Ne mogu se zamisliti ni na jednom radnom mjestu koje nije škola i rad s djecom.

4. Šta mislite o tome kako djeca doživljavaju pedagoga u školi? Kakva su Vaša iskustva?

U većini slučajeva ga doživljavaju s nelagodom jer pedagoge predstavljaju kao policajce ili sudije koji kažnjavaju, međutim nije tako. Pedagog je tu da vodi grupne ili individualne razgovore, bez obzira na problematiku, da bude podrška učenicima da savladaju poteškoće u ponašanju, učenju, adaptaciji, da pomaže u razvijanju socijalnih vještina i sposobnosti rješavanja sukoba.

5. Šta biste poručili današnjim generacijama?

Moja poruka učenicima bila bi da vjeruju u sebe, da teže ka ispunjavanju svoji realnih ciljeva, da istražuju i da uče, jer znanje je njihova moć koju im niko ne može oduzeti.



INTERVJU SA NASTAVNICOM LIKOVNE KULTURE, LEJLOM ZUKIĆ

1. Možete li nam se kratko predstaviti i reći nešto zanimljivo o sebi?

Trenutno radim kao nastavnica likovne kulture u OŠ Mramor. Završila sam Akademiju likovnih umjetnosti u Sarajevu i magistrirala na istoj. U prosvjeti radim već 8 godina.

2. Da li ste oduvijek htjeli biti nastavnica?

Moćda ne nastavnica, ali umjetnik sigurno i onda je to nekako došlo samo od sebe, ta želja da prenesem djeci ono što i sama radim.

3. Da niste nastavnica likovne kulture ko biste bili?

Možda bih bila psihijatar, to mi se oduvijek dopadalo i volim gledati filmove sa tom tematikom. Volim se baviti ljudskim dušama.

4. Kakvi su Vaši utisci o ovoj školi i učenicima?

Meni se ova škola dopada, zato što je stariji tip škole i dopadaju mi se upravo takve škole koje imaju dušu. Većina učenika je kulturna, ali bih voljela da svi nastavnici imaju svoje kabinete koji su opremljeni prema potrebama predmeta.

5. Šta radite u slobodno vrijeme?

U slobodno vrijeme čitam knjige, slikam, gledam filmove, volim svaki vid umjetničkog izražavanja, volim gledati ljude koji su malo drugačiji, volim pričati sa mlađim osobama koje se baš ne snalaze u ovoj okolini, volim gledati predstave i ići u pozorište.



Prilog iz područne škole "Donja Dragunja"



Učenici područne škole "Dragunja Donja" su mala ali odabrana ekipa. Njihova učiteljica, Amira Delić, pripremila nam je i ovaj put zanimljiv prilog o njihovim zajedničkim aktivnostima.



Mi smo Ajnur i Dajla. Mi smo učenici koji su se ove godine upisali u 1. razred. Samo nas je dvoje! Najmlađi smo, ali i najslađi.




Mi smo Armen i Najla.

Titula najvoljenijih učenika u našoj školi pripala je nama.

Ovo polugodište imali smo brojne aktivnosti u našoj školi pa vam danas predstavljamo neke od njih!



Illa - Primjer posvećenosti i kreativnosti



Učenci Illa razreda naše škole redovno se ističu svojom angažovanošću u raznim aktivnostima i radionicama povodom obilježavanja značajnih datuma. U prvom polugodištu posebno su se istakli u obilježavanju sljedećih događaja:

- ****Međunarodni dan mira****: Organizovane su radionice u kojima su učenici izražavali svoje stavove o značaju mira kroz crtanje i pisanje poruka mira.
- ****Jesen****: Kroz likovne i kreativne radionice, učenici su izražavali ljepotu jeseni, stvarajući zanimljive dekoracije od prirodnih materijala.
- ****Dječija nedjelja****: Održane su razne igre i sportske aktivnosti kojima su učenici promovisali prava i radosti djetinjstva.
- ****Dan jabuka i zdrave hrane****: Učenici su kroz praktične radionice pripremali zdrave obroke i učili o značaju zdrave ishrane.
- ****Krunisanje kralja Tvrtka I Kotromanića****: Organizovana je edukativna radionica na kojoj su učenici istraživali o historijskom značaju ovog događaja za našu zemlju, učestvovali su u priredbi povodom ovog važnog datuma.
- ****Kupujemo domaće****: Učenici su izrađivali plakate i razgovarali o prednostima podržavanja domaćih proizvoda.
- ****Međunarodni dan dječijih prava****: Na radionicama su obrađivane teme prava djeteta, gdje su učenici izražavali svoja mišljenja kroz kreativne aktivnosti.
- ****Zima****: Kroz pjesme, priče i crteže, učenici su obilježili dolazak zime, naglašavajući radost ovog godišnjeg doba.

Osim toga, svi učenici od I do V razreda zajednički su posjetili vatrogasnu stanicu u Tuzli. Tokom posjete, imali su priliku upoznati se sa radom vatrogasaca, pregledati njihova vozila i opremu te razgovarati o načinima gašenja požara. Ova posjeta izazvala je posebno oduševljenje među učenicima, koji su postavljali brojna pitanja i pokazali veliki interes za ovu plemenitu profesiju.

Učiteljica: Nermina Džafić



Pedagoški kutak



Irma Ibrišević,
pedagogica




U ovom broju našeg Školarca prezentiramo vam savjete koje je za vas izdvojila pedagogica škole, Irma Ibrišević

Kako postati najbolja verzija sebe?

Dragi učenici,

svako od vas ima jedinstvene sposobnosti i talente koji vas čine posebnim. Postati najbolja verzija sebe ne znači biti savršen, već raditi na tome da svakim danom budete bolji nego jučer. Evo nekoliko savjeta kako to postići. Najlakši način za to je da zapišeš svoje ciljeve na papir i svakodnevno pokušaš dodati na popis što si napravio/la da ideš u pravom smjeru.



1. Postavljajte ciljeve!

Odredite šta želite postići, bilo da je to bolja ocjena iz omiljenog predmeta, učenje nove vještine ili pomoć prijatelju.

2. Budite radoznali!

Pitajte, istražujte i nikada ne prestajte učiti. Znanje je ključ koji otvara vrata mnogim prilikama.

3. Vrijedno radite!

Uložite trud u sve što radite. Rezultati će vas uvijek nagraditi.

4. Pomažite drugima!

Biti ljubazan i spreman pomoći čini vas boljom osobom. Kada pomognete drugima, i sami se osjećate sretnije.

5. Ne bojte se grešaka!

Greške su prilike da učite i rastete. Važno je ne odustajati.

6. Njeguajte zdrav život!

Bavite se sportom, jedite zdravu hranu i dovoljno spavajte. Vaše tijelo i um će vam biti zahvalni.

7. Vrijeme za porodicu i prijatelje!

Njeguajte odnose sa svojim bližnjima jer su oni vaš oslonac u životu.

8. Razvijajte hobije!

Bavite se stvarima koje volite, bilo da su to crtanje, pisanje, sport ili muzika. Svakako smanjite upotrebu mobilnog telefona, jer postoji mnoštvo korisnijih hobija!

Zapamtite, svaka mala promjena vodi ka velikom uspjehu. Budite ponosni na svoj trud i napredak jer je upravo to ono što vas čini najboljom verzijom vas samih! Za sva dodatna pitanja stojim vam na raspolaganju! Učimo i rastimo zajedno!

Vaša pedagogica



IZ

ŠKOLSKIH

ŠKOLSKIH

KLUPA